



Komunikadu Imprensa

20 Dezembru 2024

Partisipante fetu ba formasaun iha “lideransa transformativa” Munisípiu Aileu husu JSMP organiza formasaun ba líder partidu polítiku sira hotu no ezije ukun na’in sira atu la bele partidariza serbisu públiku

Partisipante fetu ba formasaun iha “*lideransa transformativa*” iha Aileu husu JSMP atu organiza formasaun ba líder partidu polítiku sira no ezije ukun na’in sira atu la bele partidariza serbisu públiku. Pedidu no ezijénsia ne’e apresenta iha sesaun formasaun ne’ebé realiza iha 16 Dezembru 2024, iha Munisípiu Aileu.

“JSMP komprometidu atu continua promove atividade formasaun no sensibilizaun sira relativamente ba asunto lideransa, integridade no akontabilidade hodi permite partisipasaun luan no ativu sidadaun hotu, partikularmente organizaun fetu sira iha setór oioin, inklui kuadru partidu polítiku sira no lideransa organizaun sosiedade sivil ne’ebé dalabarak la iha oportunidade atu espresa no manifesta sira ninia hanoin no explora sira ninia potencialidade atu kontribui ba prosesu dezvoltamentu nasional”, dehan Diretora Ezekutiva Sra. Ana Paula Marçal JSMP.

Formasaun ne’e dezeńha ho objetivu: 1) Atu kontribui ba hasa’e nível koñesimentu no kapasidade fetu potenciál sira kona-ba lideransa transformativa iha setór hotu-hotu, partikularmente iha setór polítiku-lejizlativa; 2) Atu promove partisipasaun ativu fetu iha nível hotu-hotu no representasuan ida ho kualidade; no 3) Asegura katak bainhira iha oportunidade atu konkorre kargu públiku sira bele dezempeña no ezerse knaar ka funsaun sira ho profisionál, integridade, akontabilidade no mós ho koñesimentu adekua no produtivu.

Iha sesaun abertura, representante hosi Feto Nia Asaun Ba Dezenvolvimentu Aileu (FADA), Sra. Agostinha Madeira, iha nia intervensaun, subliña katak iha matéria ida-ne’e di’ak tebes hodi haforsa sira nia membru sira atu bele aprende no hatene di’ak liu tan kona-ba oinsá atu sai lideransa di’ak bainhira assume knaar públiku ruma iha futuru, liuliu iha Munisípiu Aileu.

Nia avalia katak grupu fetu sira hetan ona formasaun oioin kona-ba lideransa hosi parseriu sira, maibé matéria JSMP sei fasilita iha kontestu ida diferente tanba lori tema importante sira kona-ba integridade, onestidade no anti korrupsaun. Ne’e tema transversál ne’ebé lideransa fetu sira nesesariamente presiza integra iha aspetu lideransa atu sai lideransa ida ne’ebé di’ak no efetivu. Tanba ne’e, nia enkoraza partisipante sira atu aproveita oportunidade ne’e ho di’ak hodi eleva tan sira nia koñesimentu hodi kontribui ba sira nia knaar lorloron no iha futuru bainhira hetan fiar husi estadu.

Entretantu, iha formasaun ne’e matéria sira foku ba lideransa tranformativa ne’ebé diskuti no explora tema relevante sira hanesan; conseitu lideransa transformativu ne’ebé hahú hakle’an ho saída mak lideransa, lideransa tuir péritu sira ninia hanoin/hanorin, diferença entre líder, jestór,

xefe no patraun ka bos, tipu lideransa, kualidade lideransa ne'ebé integra valór sira kona-ba integridade, onestidade, responsabilidade (akontabilidade), anti-korrupsaun ne'ebé nu'udar elementu xave iha konseitu lideransa iha era atuál.

Alende ne'e mós, JSMP apresenta mós matéria relevante balun kona-ba demokrasia, knaar órgaun soberanu sira nian, no partisipasaun públiku iha prosesu foti desizaun polítika no halo lei. Matéria sira ne'e hotu elabora iha manuál ne'ebé distribui ba partisipante sira no finánsia hosi fundu GASC.

Durante sesaun diskusaun, partisipante sira espresa sira ninia laran haksolok tanba bele iha oportunidade hodi aprende kona-ba kestaun lideransa ho ninia konseitu no valór asosiadu sira ne'ebé líder sira merese tenke iha atu bele sai líder ida ne'ebé iha kualifikasaun ba area hirak ne'e. Partisipante sira hatutan katak matéria sira ne'e relevante tebese bainhira ita reflète ba dinámika polítika atuál ne'ebé iha tendénsia ba ukun ida-ne'ebé la hatuur aas interese estadu maibé haree liu ba interese partidu ka kór polítiku.

Depois observa matéria hirak ne'e no avalia dinámika polítika atuál, liuliu relasiona ho komportamentu lideransa sira tantu iha partidu ida-idak no líder sira ne'ebé agora iha poder, partisipante sira rekomenda ba JSMP atu organiza fali formasaun sira hanesan ne'e ba liderasan partidu polítiku hotu iha Timor. Sira mós propoin atu iha sesaun seluk ho grupu fetu sira iha área remota sira no ema ho difisiénsia, joven sira, atu bele aprende kona-ba konseitu, kualidade lideransa hirak ne'ebé relevante atu reflète kontestu ohin lora nian. Partikularmente valór sira kona-ba integridade, onestidade, umilidade, nu'udar elementu esensiál tanba sira avalia katak lideransa sira lakon karakteristiku hirak ne'e iha kontestu polítika atuál.

Partisipante sira énfaze liutan katak lideransa sira tenke trata ema ho dignu no labele halo diskriminasaun bazeia kór ka afiliasaun partidária, koloka ema tuir méritu no kapasidade, fó oportunidade ba ema hotu hodi kompete iha kargu no sai lideransa ida la'ós aproveita atu benefisia grupu ka familia. Alende ne'e, sira apresenta preukupasaun sériu kona-ba partidarizasaun iha setór públiku nu'udar dezafiu boot iha politika atuál.

Totál partisipante sira iha formasaun ne'e hamutuk na'in 19 ne'ebé mai hosi partidu polítiku sira iha asentu parlamentár no organizasaun sosiedade sivil ne'ebé kompostu hosi CNRT na'in 2, Fretilin na'in 2, PD na'in 1, PLP na'in 2, KHUNTO na'in 2 no partisipante sira seluk mai hosi organizasaun Asosiasaun Feto Munisipiu Aileu (FADA) ema na'in 10. Atividade ne'e realiza ho apoiu finanseiru hosi Gabinete Apoiu Sosiedade Sivil (GASC), iha Gabinete II Vise Primeiru-Ministru, Governu Konstitusionál IX.

Atu hetan informasaun kompletu favor kontaktu:

Ana Paula Marçal

Diretóra Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl> info@jsmp.tl